



UDRUŽENJE GRAĐANA SPORTSKIH

RIBOLOVACA «BISTRO» ZENICA

ZENICA

BULEVAR KULINA BANA 32. , 72 000 ZENICA

tel/fax +387 32 242 212, e-mail bistroze@yahoo.com

TRANSAKCIJSKI RAČUN: 3389002200293108 UNI CREDIT BANK

P R A V I L N I K

**O DISCIPLINSKOJ ODGOVORNOSTI SPORTSKIH RIBOLOVACA ČLANOVA
UGSR „BISTRO“ ZENICA**

ZENICA, 2013. GODINA

Na temelju člana 27. Statuta UGSR „Bistro“ Zenica, Skupština Udruženja na svojoj sjednici održanoj dana 21.12.2013. godine donosi:

P R A V I L N I K

O DISCIPLINSKOJ ODGOVORNOSTI SPORTSKIH RIBOLOVACA ČLANOVA UGSR „BISTRO“ ZENICA

I – OSNOVNE ODREDBE

Član 1.

Ovim Pravilnikom se utvrđuju osnovna pravila ponašanja članova Udruženja Građana Sportskih Ribolovaca “Bistro” Zenica (u daljem tekstu: UGSR “Bistro” Zenica) u toku ribolova, kao i svim drugim prilikama i okolnostima koje ih čine bliskim sa ovom sportskom aktivnošću, te drugim aktivnostima u prirodi koje se mogu posredno vezati sa rijekama i njihovim biološkim sadržajima na ribolovnoj zoni UGSR “Bistro” Zenica.

Ovim Pravilnikom se posebno utvrđuju povrede pravila ponašanja sportskog ribolovca u okolnostima iz predhodnog stave, zatim disciplinske mjere, kao i disciplinski organi i sam tok disciplinskog postupka.

II – OSNOVNA PRAVILA PONAŠANJA SPORTSKIH RIBOLOVACA

Član 2.

Ponašanje sportskih ribolovaca mora u cijelosti biti prilagođeno interesima i programskim ciljevima UGSR “Bistro” Zenica, a to znači da se članovi moraju:

1. strogo pridržavati odredbi propisanih Statutom Udruženja, Zakonom o slatkovodnom ribarstvu, drugih propisa u oblasti sportskog ribolova, kao i odluka i zaključaka donesenih od strane organa UGSR “Bistro” Zenica;
2. štiti i čuvati prirodno bogatstvo i čistoću životnog prostora;
3. štiti riblji fond;
4. učestvovati u drugim aktivnostima društva čiji je cilj ostvarenje programskih zadataka.

III – POVREDE PRAVILA PONAŠANJA

Član 3.

Svako ponašanje suprotno pravilima iz člana 2. povlači disciplinsku odgovornost sportskih ribolovaca, bez obzira na posljedice takvog ponašanja.

Član 4.

Za povrede pravila ponašanja članovi društva odgovaraju disciplinski u disciplinskom postupku propisanim ovim pravilnikom.

Za nanošenje štete društvu i ribljem fondu na području društva, sportski ribolovci odgovaraju po općim pravilima odgovornosti za štetu i posebnim odredbama za štetu nanесenu ribljem fondu.

Član 5.

S obzirom na težinu posljedica kršenja propisanih pravila ponašanja (koje su nastupile ili prijetile da nastupe) povrede pravila ponašanja utvrđuju se kao lahke i teške povrede.

a) LAHKE POVREDE PRAVILA PONAŠANJA

Član 6.

Lahkim povredama pravila ponašanja smatraju se sva ona ponašanja sportskih ribolovaca čije su posljedice neznatne ili uopšte nisu nastupile, ali je njihova pojava nepoželjna i protivna programskim ciljevima udruženja.

Član 7.

Lahkim povredama pravila ponašanja smatraju se:

- *omalovažavanje i vrijeđanje drugih sportskih ribolovaca, organa sportsko ribolovnog društva i čuvara ribljeg fonda;*
- *neuklanjanje otpadaka sa mjesta kampovanja i ribolova;*
- *ne vođenje evidencije o dnevnim izlascima u ribolovu;*
- *odbijanje učestvovanja u akcijama poribljavanja, čišćenja prirodnog okoliša i drugim akcijama društva, čiji je cilj ostvarenje programskih zadataka;*
- *sva druga ponašanja koja s obzirom na posljedice predstavljaju lahku povredu pravila ponašanja.*

b) TEŠKE POVREDE PRAVILA PONAŠANJA

Član 8.

Ponašanje sportskih ribolovaca čije posljedice nanose štetu ribljem fondu, narušavaju ugled udruženja i sportskog ribolovca čine nepodobnim za obavljanje aktivnosti sportskog ribolova, svrstavaju se u teške povrede pravila ponašanja.

Član 9.

Teške povrede pravila ponašanja su:

- a) lov ribe nedozvoljenim mamcima;*
- b) lov ribe nedozvoljenim sredstvima (mrežom, rukama, više od jedne udice na plovak ili dvije sa olovom tzv. raub i td.);*
- c) ulov ribe ispod propisanih mjera dužine;*
- d) ulov ribe preko dozvoljene količine;*
- e) lov ribe u ribljim plodištima;*
- f) lov ribe bez propisane dozvole;*
- g) ne vođenje evidencije o dnevnim izlascima;*
- h) višestruko ponašanje koje predstavlja lahke povrede pravila ponašanja;*
- i) sva druga ponašanja kojima se ribljem fondu i udruženju nanosi materijalna šteta u znatnijem obimu.*

Član 10.

*Prijave protiv članova udruženja koji prekrši stavke **B**, **F** i **I** iz člana 9 se automatski prosljeđuju Upravi za inspeksijske poslove Zeničko-dobojskog kantona.*

Pored toga, protiv ovakvih osoba će biti poduzete i slijedeće mjere:

- 1. Ukoliko se kod prekršioca nađe ulov uz prijavu će biti podnesen i zahtjev za obeštećenje Udruženja u skladu sa Zakonom o slatkovodnom ribarstvu;*
- 2. Minimalna kazna za raub iznosi 1 godina zabrane ulaska u prostorije, kao i 1 godina zabrane ribolova na vodama kojim gazduje Udruženje;*
- 3. O zabranama će biti upoznata susjedna Udruženja i od istih će se tražiti da prekršiocima ne izdaju dozvole;*
- 4. Član protiv kojeg se podnese prijava za raub nemože više nikada biti biran u organe Udruženja;*
- 5. Ukoliko se desi da je prijava podnesena protiv člana koji se u trenutku njenog podnošenja nalazi na bilo kojoj funkciji u Udruženju kazna će biti duplo veća (2 godine zabrane ulaska u prostorije i 2 godine zabrane ribolova).*

IV – DISCIPLINSKE MJERE

Član 11.

Zbog povrede pravila ponašanja propisanih Statutom udruženja, ovim pravilnikom i drugim aktima društva počiniocu se mogu izreći slijedeće disciplinske mjere:

1. *pismena opomena;*
2. *javna opomena uz uslovnu kaznu od 3 do 6 mjeseci;*
3. *zabrana sportskog ribolova na području sportsko ribolovnog društva u trajanju od 1 godine;*
4. *isključenje iz sportsko ribolovnog društva.*

Član 12.

Pismena opomena izriče se za lahke povrede pravila ponašanja.

Javna opomena izriče se za više uzastopnih lakih povreda ponašanja, kao i za teže povrede pravila ponašanja kod kojih je primjetno odsustvo težih posljedica.

Član 13.

Zabrana sportskog ribolova i isključenje iz sportsko ribolovnog društva izriče se po pravilu za povrede pravila ponašanja čije su posljedice znatnije materijalne štete i narušavanje ugleda sportsko ribolovnog društva.

V – DISCIPLINSKI ORGANI

Član 14.

Disciplinski organi u sportsko ribolovnom društvu su:

- a) *Disciplinski sud;*
- b) *Upravni odbor, kao drugostepeni organ odlučivanja;*
- c) *Skupština, kada se radi o tački 4 iz člana 11 ovog pravilnika.*

a) DISCIPLINSKI SUD

Član 15.

Disciplinski sud čine trojica sudija, koje u slučaju njihove spriječenosti zamjenjuju njihovi zamjenici.

Sudije Disciplinskog suda i njihove zamjenike imenuje Skupština udruženja na vrijeme od 4 godine. Disciplinski sud sudi u sastavu od trojice sudija.

Sudsko vijeće iz stave 3 ovog člana određuje iz svog sastava najstarijeg člana za predsjednika sudskog vijeća.

b) DRUGOSTEPENI ORGAN ODLUČIVANJA

Član 16.

Drugostepeni organ odlučivanja povodom izjavljene žalbe je Upravni odbor udruženja.

Član 17.

Odluka Upravnog odbora je konačna i izvršna u disciplinskom postupku, osim ako se radi o odluci o isključenju iz sportsko ribolovnog društva, gdje Skupština donosi konačnu odluku.

VI – DISCIPLINSKI POSTUPAK

a) DISCIPLINSKA PRIJAVA

Član 18.

Inicijativa za pokretanje disciplinskog postupka se daje disciplinskom prijavom. Disciplinsku prijavu podnosi čuvar ribljeg fonda, društvena kontrola i svaki član Udruženja.

Član 19.

Čuvar ribljeg fonda mora podnijeti disciplinsku prijavu u svakom slučaju uočene povrede pravila ponašanja. Propuštanje ove radnje od strane čuvara predstavlja jedan od osnova za prestanak radnog odnosa.

Član 20.

Svaki član Udruženja je dužan podnijeti disciplinsku prijavu čim uoči ili sazna iz drugih izvora za povredu pravila ponašanja. Ne izvršavanjem ove dužnosti svaki član čini lakšu ili težu povredu pravila ponašanja.

Član 21.

Disciplinska prijava sadrži:

- *prezime i ime sportskog ribolovca koji je povrijedio propisana pravila ponašanja;*
- *datum, mjesto i vrijeme povrede pravila ponašanja;*
- *opis povrede pravila ponašanja;*

- dokazi (očevidci i materijalni dokazi);
- vrstu i količinu primjeraka kojima je oštećen riblji fond;
- datum podnošenja prijave i potpis podnosioca.

Član 22.

Disciplinska prijava se podnosi na posebnom obrascu koji je propisan ovim pravilnikom kao obrazac "A", a može se podnijeti običnim pismenim obavještenjem koje sadrži neophodne podatke za pokretanje disciplinskog postupka, kao i usmenom izjavom na zapisnik kod sekretara sportsko ribolovnog društva ili čuvara ribljeg fonda.

Član 23.

Disciplinska prijava se predaje:

- čuvaru ribljeg fonda;
- sekretaru sportsko ribolovnog društva.

b) ZAHTJEV ZA POKRETANJE DISCIPLINSKOG POSTUPKA

Član 24.

Lica iz člana 23. su dužna bez odlaganja disciplinsku prijavu dostaviti disciplinskom sudu.

Disciplinski sud je dužan odmah po prijemu ispitati disciplinsku prijavu i okolnosti u vezi sa istom, pa je ovlašten pozvati na razgovor:

- podnosioca prijave;
- čuvara ribljeg fonda;
- prekršioca discipline.

Član 25.

Zahtjev za pokretanje disciplinskog postupka sadrži:

- naznačenje sportsko ribolovnog društva;
- naznačenje lica protiv koga se pokreće disciplinski postupak;
- datum, mjesto i vrijeme počinjene povrede pravila ponašanja;
- opis povrede pravila ponašanja;
- kvalifikacija povrede.

c) ZAKAZIVANJE DISCIPLINSKE RASPRAVE

Član 26.

Po prijemu zahtjeva za pokretanje disciplinskog postupka sudija uz pomoć sekretara društva određuje sastav sudskog vijeća i zakazuje disciplinsku raspravu. O ovoj raspravi obavještava odgovornog člana, a po potrebi i druga lica. U obavještenju se obavezno navodi vrijeme i mjesto održavanja disciplinske rasprave.

Član 27.

Neopravdano odsustvo odgovornog lica nije prepreka za vođenje disciplinskog postupka i izricanje mjere.

d) TOK DISCIPLINSKOG POSTUPKA

Član 28.

Disciplinski postupak počinje objavom od strane predsjednika vijeća koji konstatuje sastav vijeća i prisutna lica.

Nakon disciplinske optužbe poziva se odgovorni član Udruženja da se izjasni o tome da li je razumio čime ga tereti optužba id a iznese prijedloge dokaza za svoju odbranu.

U daljem toku postupka vrši se izvođenje dokaza, a po potrebi i saslušanje svjedoka, uvid u priložene materijalne dokaze i dokumentaciju.

Član 29.

Nakon izvedenih dokaza predsjednik disciplinskog suda daje ocjenu dokazanosti počinjene povrede pravila ponašanja, te predlaže da se odgovornom članu za povredu pravila ponašanja izrekne disciplinska mjera u skladu sa ovim pravilnikom ili da se ukoliko njegova odgovornost nije dokazana oslobodi disciplinske odgovornosti.

Član 30.

Po izlaganju predsjednika disciplinskog suda daje se riječ odgovornom članu da iznese svoju odbranu.

Član 31.

Nakon završne riječi odbrane disciplinski sud donosi disciplinsku odluku kojom počinocu povreda pravila ponašanja izriče jednu od disciplinskih mjera propisanih ovim pravilnikom ili optuženog oslobađa disciplinske odgovornosti.

e) ZAPISNIK**Član 32.**

Cijelim tokom disciplinskog postupka vodi se zapisnik u koji se upisuje sadržaj, izjava predsjednika disciplinskog suda, odgovornog člana, svjedoka i drugih saslušanih lica, kao i sve druge dokaze koji su izvedeni u toku disciplinske rasprave.

Na kraju zapisnika upisuje se izvornik odluke disciplinskog suda i zapisnik potpisuju svi članovi sudskog vijeća, kao i zapisničar.

f) DISCIPLINSKA ODLUKA**Član 33.**

Najkasnije mjesec dana nakon održane disciplinske rasprave i donesene disciplinske mjere predsjednik sudskog vijeća dužan je sačiniti pismeni otpравak odluke o disciplinskoj mjeri, koji sadrži:

- *naziv sportsko ribolovnog društva uz naznačenje disciplinskog organa;*
- *sastav sudskog vijeća i naznačenje predsjednika tog vijeća;*
- *datum održavanja disciplinske rasprave;*
- *naznačenje odgovornog sportskog ribolovca;*
- *utvrđenje da je odgovoran ili da se oslobađa odgovornosti;*
- *naznačenje povrede pravila ponašanja koja mu se stavlja na teret;*
- *disciplinska mjera koja mu se izriče;*
- *obrazloženje disciplinske odluke;*
- *pouka o pravnom lijeku;*
- *potpis predsjednika sudskog vijeća sa pečatom sportsko ribolovnog društva.*

Član 34.

Odluka o izrečenoj disciplinskoj mjeri dostavlja se odgovornom sportskom ribolovcu, disciplinskom sudu i sekretaru društva.

VII – DRUGOSTEPENI DISCIPLINSKI POSTUPAK

a) ŽALBA PROTIV PRVOSTEPENE DISCIPLINSKE ODLUKE

Član 35.

Protiv odluke disciplinskog suda sportski ribolovac može izjaviti žalbu u roku od 8 dana od dana uručenja odluke. Žalba se dostavlja sekretaru društva. Odluku povodom izjavljene žalbe donosi upravni odbor sportsko ribolovnog društva.

Član 36.

Na sjednicu upravnog odbora na kojoj se odlučuje povodom žalbe se poziva predsjednik sudskog vijeća koje je donijelo prvostepenu odluku, a po ocjeni predsjednika upravnog odbora se može pozvati i odgovorni sportski ribolovac.

Član 37.

Član sudskog vijeća izvještava upravni odbor o toku disciplinskog postupka i izrečenoj disciplinskoj mjeri sa obrazloženjem odlučnih činjenica koje su rukovodile sudsko vijeće da izrekne disciplinsku mjeru povodom koje odlučuje upravni odbor. Član sudskog vijeća može nakon izvještaja predložiti da se izrečena disciplinska mjera potvrdi sa kratkim obrazloženjem tog prijedloga.

Nakon izvještaja člana sudskog vijeća i odgovornog sportskog ribolovca, ukoliko je prisutan, članu sudskog vijeća mogu se postavljati pitanja, a članovi upravnog odbora mogu dati svoje viđenje i prijedlog drugostepene odluke. Nakon ovako provedene rasprave upravni odbor donosi odluku kojom:

- a) potvrđuje odluku disciplinskog suda;*
- b) vraća disciplinski predmet na ponovni postupak, ukoliko su uočeni nedostaci u tom postupku koji mogu bitno uticati na odluku;*
- c) oslobodi odgovornog sportskog ribolovca disciplinske odgovornosti.*

Član 38.

Ukoliko se u roku od 8 dana odgovorni sportski ribolovac nije žalio na odluku disciplinskog suda ili upravni odbor potvrdi prvostepenu disciplinsku odluku, ova odluka postaje konačna i izvršna.

VIII – IZVRŠENJE DISCIPLINSKIH MJERA

Član 39.

Drugostepena disciplinska odluka dostavlja se disciplinskom sudu i odgovornom sportskom ribolovcu.

Član 40.

Konačna disciplinska mjera izvršava se u roku od 15 dana.

Dostavom drugostepene odluke kojom je potvrđena disciplinska mjera pismene opomene smatra se da je ova mjera izvršena.

Disciplinska mjera javna opomena izvršava se javnim oglašavanjem u službenim prostorijama društva i oglašavanjem u javnom glasilu sportsko ribolovnog društva.

Disciplinsku mjeru zabrane sportskog ribolova u određenom trajanju i disciplinska mjera isključenja iz sportsko ribolovnog društva izvršava se dostavom drugostepene odluke sekretaru društva, čuvaru ribljeg fonda, odgovornom sportskom ribolovcu i objavljivanjem odluke u javnom glasilu sportskih ribolovaca.

IX – ZAVRŠNE ODREDBE

Član 41.

Izmjene i dopune ovog pravilnika donose se postupkom propisanim za donošenje pravilnika.

Član 42.

Pravilnik stupa na snagu danom donošenja.

Zenica, 2013. godina

PREDSJEDNIK SKUPŠTINE UDRUŽENJA

AMIR KAPETANOVIĆ